

欽
定
全
唐
文

欽定全唐文卷五百五目錄

權德輿 二十三

唐故銀青光祿大夫守吏部尚書兼御史大夫充

諸道鹽鐵轉運等使上柱國趙郡開國公贈尚

書右僕射李公墓誌銘

并序

唐丞相金紫光祿大夫守太保致仕贈太傅岐國

公杜公墓誌銘

并序

唐故金紫光祿大夫檢校司空兼尚書左僕射同

中書門下平章事上柱國魏國公贈太傅賈公

墓誌銘 并序

故幽州盧龍軍節度副大使知節度事管内支度
營田觀察處置押奚契丹兩番經畧盧龍軍等
使開府儀同三司檢校司徒兼中書令幽州大
都督府長史上柱國彭城郡王贈太師劉公墓
誌銘 并序

唐故河中晉絳慈隰等州節度使支度營田觀察
處置等使開府儀同三司檢校太尉兼中書令
河中尹上柱國延德郡王食邑三千戶贈太師

張公墓誌銘

并序

唐故山南西道節度營田觀察處置等使開府儀
同三司檢校尚書左僕射同中書門下平章事
兼興元尹上柱國馮翊郡王贈太保嚴公墓誌

銘

并序

欽定全唐文卷五百五

權德輿 二十三

唐故銀青光祿大夫守吏部尚書兼御史大夫充
諸道鹽鐵轉運等使上柱國趙郡開國公贈尚

書右僕射李公墓誌銘

并序

惟元和四年夏五月丁卯冢宰趙郡公巽寢疾薨於永崇
里享年六十三天子憫然不視朝追命右僕射冬十月乙
酉返葬於洛師緱氏縣芝田鄉之大墓公字令叔趙郡贊
皇人曾祖知讓皇河南府長水縣主簿祖承允江州別駕

贈太府少卿父嶷右武衛錄事參軍飾終四加至尚書右僕射代載德善至公昌大始以明經筮仕爲華州參軍試言超絕補鄠縣尉登朝爲監察御史殿中侍御史由美原縣令課最爲刑部員外郎由萬年縣令課最爲戶部左司二郎中由常州刺史理刑第一徵爲給事中以御史中丞領潭州刺史湖南觀察使就加右散騎常侍以右散騎常侍領洪州刺史江西觀察使就加御史大夫由二府報政入爲兵部侍郎在塗加度支鹽鐵副使至止踰月代今司徒岐公爲使明年遷兵部尚書閏一歲轉吏部尚書總八

柄平九賦左右理道以紓元元天子方推心竦意倚以爲
相奄然大病斯可痛也公溫重方嚴愷悌忠清得洪範之
正直稟大雅之明哲強志特立爲儒門吏師申臺草議左
曹還詔法程之下無尤違分畫之下無差失其爲二方循
班制建長利布以休和樹之風聲大凡都府歲杪使刻深
吏周行支郡鈎撫泉貨二千石不相聊生如楷拳然公至
分命部從事覽觀禮俗問人疾苦廉吏善否而已至有經
用之羨使郡自爲理得以蠲乏用補庸亡府無私焉四履
之內遇凶旱水溢捐有餘以均不足農里無大乏官司無

宿憂而邦鄉碩生勸學講藝道彼輕僿率循教化皆有聲
詩揭於康莊其制國用也調盈虛御輕重阜齊人之業而
地不加賦佐公家之急而利無所滯先是池澤之稅因緣
爲奸牢盆以私幣貨寢濫公則去一朝之便質終歲之成
變其苦窳以寬物力盈入之數不可勝條上嗣位之歲發
武庫禁兵以誅劉闢三蜀之饋不乏於軍千金之費不征
於人揚天聲於井絡斷戎首於齊斧是皆謀猷大績經理
大本豈止於漢庭桑大夫耿中丞區區然商功利析秋毫
而已哉其爲天官已嬰寢患猶與郎吏切劘奏書去繳繞

典侯服旋委節旄貞師淮海凡居鎮十五年歷禮刑二尚書乃進左揆燮和大政拜章來朝兼理公台綢繆樞極在帝左右順宗諒闇公攝冢宰因山復土專護其任進掌五教乃平九賦永貞內禪公奉典策今上繼明真授司徒備物采飾褒優章灼推致四時之和茂明萬物之宜初公來朝之明年年及懸車抗章告老三上不允厥後詔公每旬一朝訪決重務以公年與德耆尊禮不名後八歲天子憫煩公以官職之事恩遂堅請禮優師臣大雅稱方叔元老且非宰政東漢之胡公中庸不理藩服曷若公都將相之

重兼文武之全三代論道兩朝總已縉紳瞻仰者凡六十年致仕就第極其榮號嚮用五福閭然得之在臨川有愷悌之化涖南海有威懷之畧自淮而南興事任力三邦之人類其聲詩炳如嵩華刻在金石公既當安危注意之重一人倚賴急宣密啟多所交感嘉保太平承寧諸侯或洒其煩言或導其善氣損怨服義日用不知至有執介圭朝象魏冠功臣之表近天子之光爲時龜龍公所樞極喜士容物羣而不黨理遣情恕犯而不校一言定交死生以之趨人之急唯恐不及不徼福不乞靈物怪氣酸不接於心

術誠明坦蕩自得於天理中正之外無自入焉國門南出
杜陵故地畎清流疎灌叢鴈竿引滿金絲合奏時賢儁人
結轍在門極謝安之林墅異陸賈之裘橐鄉耆時會鷗鳥
不驚又以見公放懷推仁無不逮也至若閱天下之義理
究先王之法志著通典二百篇誕章宏議錯綜古今經代
立言之旨備焉凡推轂之士繇幕廷而奮迅者近於百輩
將相六職左右曹臺以至列藩二千石不可勝書夫人安
定郡梁氏蘇州常熟縣令幼睦之女也專柔淑慎動有儀
矩先於公歿幾三十年矣嗣子司農少卿師損與其弟昭

應縣令式方駕部員外郎從郁等皆以材能孝謹爲卿大
夫元士推擇之際以吏資廕庥之下有淑聲儼然摧剝相
眎無怙誠信哀敬實加於人以德興常忝府辟晚聯台座
每荷同升之義盍陳無愧之辭直書德輝以鏤幽礎銘曰
君子之用可以大受斤斤岐公祇事三后謨明盛時其道
甚夷乃將乃相乃公乃師六府和平五福叢滋齊之溫良
商之慈愛推本性術發舒光大宣力中外勤勞翼戴縣車
乞身知進知退歲在大梁月生一陽以佚以息忽乎茫茫
厥綈納書禮優職喪智氣在上昭明光揚少陵鬱鬱著蔡

協吉宰木號風虞泉落日吁嗟岐公居此元室

唐故金紫光祿大夫檢校司空兼尚書左僕射同
中書門下平章事上柱國魏國公贈太傅賈公

墓誌銘

并序

德宗皇帝享國二十有七年注意於將相之臣惟魏國賈
公諱耽字敦詩始則四握兵符保釐節制終乃再踐師長
變和樞極文武致用實寧斯人景鐘書伐金鼎和味咸有
一德用平泰階奉綴衣之詔公始感疾先復土之期公乃
捐館屬太上皇重公耆碩進加司空今皇帝憫公徽懿追

命太傅春秋七十六佩相印十三年前史稱賈生通達國體其孫嘉好學世其家其曾孫捐之建議深切漢元帝爲之罷珠崖郡皆其先古之有議論風節者也曾王父遠則皇長河尉生王父知義沁源主簿贈揚州大都督都督生烈考炎之燕居不仕贈尚書左僕射皆代德安貞延耀於後公忠正仁恕極深研幾究今古於百氏窮地域於九譯乾元初寰海未靜褐衣危言始尉太平連辟大府三入御史府再爲尚書郎亞尹北都剖符西河嘉猷循行所莅居最大歷十四年冬十月繇大鴻臚貞師於梁協力羣帥平

夷江漢青綬大封烜然光明進參六職節制襄峴載會兵
車撫征淮右徵詣行宮真拜冬官明年以三后之任分正
洛師加地進律察廉唐鄧復總賦輿鎮於靈昌政成八稔
愷悌清靜於是膺審象之寄贊格天之業中外授受勤勞
王家易坤之說曰地道也臣道也惟公有博載之量露生
庶物書洪範之說曰強弗友剛克變友柔克惟公推寬信
之誠弼亮時化故其撫封也不尚禁厲不施皦察扶導善
氣折銷未萌使貪者讓躁者靜四鄰敬之如神明闔境愛
之如父母其作相也當先皇帝洪覆陰隲財成造化宗工

舊老但以忠厚承清光故公之揚麻德輝涵泳無際藹然
和平之運恬然易簡之道至若匪躬詭詞勞謙不伐者亦
何可勝言坦夷而周密廣大而潔靜從善虛已求天下之
才博聞強識通天下之志斯不可及已所著梁懷王傅碑
先君子碑陳祖德以自況載家聲於可久體要闕達邁乎
羣倫撰海內華夷圖及論次地理之書凡五十有五篇貢
在中禁傳於域內言方志者以公名家被病更時屏絕醫
術且曰吾以忠信爲孔禱死生爲天理一氣聚散斯焉順
之美櫝壽堂自爲終制隕然委化以啟手足雖從古知命

之士所難能焉夫人武功蘇氏駕部郎中守忠之曾孫處士珣之女有柔儀淑行歿於中身二十有五年矣嗣子疇太常寺協律郎早天次子麟太子司議郎少子暉京兆府參軍事馴行孝謹號眺毀瘠奉二尊裳帷合於九原刻茲樂石以永終古銘曰

麟之儀儀鳳之師師有倬魏公發輝清時外總方國埽除螟螣入居公台左右皇極於學無不通於士無不容穆如和風叩若華鐘偉材閎議信以發志中行循性其道易易始初清明紀號永貞維陽月之朔日兮返智氣於冥冥下

旬逮半兮祖載於庭神休古原兮闕此音形前直國門兮
旁邇梁傅不忘本兮公之素笳簫啟路歸此壤樹嗚呼有
唐元老兮魏公之墓

故幽州盧龍軍節度副大使知節度事管内支度
營田觀察處置押奚契丹兩番經畧盧龍軍等
使開府儀同三司檢校司徒兼中書令幽州大
都督府長史上柱國彭城郡王贈太師劉公墓

誌銘

并序

析木之下幽陵碣石融結網縕誕靈熊渾乃生元臣以翼

大君惟彭城郡王宣力三代撫封四紀在德宗朝纂服舊
勞以亞丞相得顯征伐冬官夏卿再踐六職乃列台宰乃
居師長在順宗朝論道進律就加司空又拜司徒今皇帝
聰明齊聖褒厚功德擢侍中中書令綢繆樞衡臨長諸侯
元袞赤舄崇其物采九命二伯極其名器勲猷備於贊書
終始焯於代家五年秋七月寢疾薨於莫州之廨舍享年
五十四冬十月歸全於涿州良鄉縣之某原追錫太師不
視朝三日命諫議大夫弔祠法賻廷尉卿持節禮冊又詔
宰臣德輿銘於壽堂所以加恩報勞始終滲漏之澤也公

姓劉氏諱濟字濟之蜀昭烈皇帝二十一代孫曾祖宏遠
皇檢校司衛卿臨洮軍使襲彭城郡公贈宋州刺史祖貢
皇特進左金吾衛大將軍贈揚州大都督父怍皇幽州盧
龍節度觀察等使御史大夫贈司徒恭公公承是覆露生
而岐嶷深而通直而和宏毅忠肅端明溫重固已蘊絕人
之姿挺希代之器始以門子橫經游京師有司擢上第參
幽州軍事轉兵曹掾歷范陽令考績皆爲府中最興元初
以太子家令爲莫州刺史以御史中丞爲行軍司馬凡吏
理之慰薦輿師之拊循如良庖之無肯綮良農之無滅裂

司徒卽代有詔奪情節哀順變講信修睦先公之封畛盡
在長帥之威惠畢舉比歲大旱蝻蝗爲災絜齊蔬菲默以
心禱甘雨祁祁嘉生萋萋因其豐登示以班制古諸侯之
令典靡不具焉貞元初烏桓誘北方之戎幸吾阻饑大聳
邊鄙公先計後戰陳兵於郊乃遣單車使者誘掖教告縣
是諸戎皆爲公用幹不庭方厥猷茂焉明年鮮卑墨乙之
犯古漁陽其後啜利寇右北平公分命左右軍異道並出
然後以中堅衝擊士不離傷師不留行采入其阻抵青都
山下捕斬首虜以萬級獲橐駝馬牛羊以萬數十九年林

胡率諸部雜種浸淫於澶薊之北公親統革車會九國室
韋之師以討焉飲馬灤河之上揚旌冷陁之北戎王棄其
國遜去公署南部落刺史爲王而還登山斲石著北伐銘
以見志自太行以東懷和四鄰或歸其天倫或復其地理
警急則解其顛沒居常則納諸矩度兵興以來氣俗相因
或以奢敗度或以美沒禮比屋之人被縵胡而揮孟勞不
知書術公乃修先師祠堂選幼壯孝悌之倫春秋二仲行
釋菜鄉飲酒之禮生徒俎豆若在洙泗私門眈眈公署沈
沈自從事掾史追紀綱之僕稟稍有倫采章不紊接士必

下以詞氣推賢而容其出處隴西李益樂安任公叔皆以
賓介薦延至郎吏二千石爲近臣良守此又烈丈夫大君
子曠度卓犖之爲也其於勤身裕物生聚教訓祁寒則頒
以絮帛大歉則振其倉廩一方之人蒙被惠和嘉祥交於
動植孝順決於州壤美化周行無不及焉去年冬王師問
罪於常山公率先蹈厲累上功捷引義慷慨賦詩以獻詔
宰司序引百執事屬和以美大之師次瀛州旣圍樂壽又
遣支兵急攻安平三旬未下武怒益奮命其子總以騎士
八千先登公親鼓之士皆殊死戰亭午而拔誅屠無噍類

蓋所以宣威制勝於可必也天子賜以寶劔金甲彤弓盧
矢方董諸侯之師將覆其巢俄感厲氣隱机口占署總軍
司馬曰無以吾故而稽天誅悉召戲下以須王命俄而下
霈然之詔宥罪班師加公寵渥已至大病遺章悃款不及
家事天下之人偉其懋勞總以君命起於倚廬之中委重
戎事由御史大夫爲工部尚書凡軍師之節制封部之廉
察盡如恭公太師之命焉茹荼雪泣祗服丕矩以國僑之
遺愛知公業之不亡生極榮號沒有愍冊揚名以繼志善
訓以克家君臣父子之道斯爲至矣褒大臣所以尊王命

懿武事所以恢天聲敢摠馨香以識冥漠銘曰

帝在法官推心懋功泐泐彭城秉義納忠幽都朔易賜履
來宅便藩渥命焜燿嘉績北戎病燕從古以然懷徠蕩定
勇畧昭宣燮和之重公作霖雨師律之嚴公爲齊斧廓開
稷泮振奮威武保定功庇人尊主卻穀敦悅乃主成師
善經義府公實似之北伐刻銘西征賦詩播於工歌列在
鼎彝壯猷未極大暮如斯華首童牙辛酸涕洟義方紹續
君命吉祿孝在無改恩延必復參差輅葆澶漫陵谷勒石
下泉幽元照燭

唐故河中晉絳慈隰等州節度使支度營田觀察
處置等使開府儀同三司檢校太尉兼中書令
河中尹上柱國延德郡王食邑三千戶贈太師

張公墓誌銘

并序

元和五年冬十二月戊寅太尉兼中書令延德郡王自河
中來朝明年春二月景子發塲薨於京師務本里第春秋
五十皇帝不視朝五日冊贈太師冬十月乙酉歸全於萬
年縣少陵原嗣子檢校工部尚書兼右金吾衛將軍克讓
毀瘠號慕沒於倚廬之中追命尚書右僕射次子太僕少

卿克恭檢校右散騎常侍駙馬都尉克禮等泣遵理命用
誠信襄事舉書公之大績大烈請刻石以識云公諱茂昭
字豐明其先燕人九代祖奇北齊右北平太守因封其地
代襲王爵違難出疆雄於北方曾祖遜乙失活部落刺史
祖謚皇開府儀同三司平州刺史贈太子太傅父孝忠皇
義武軍節度易定等州觀察處置等使檢校司空同中書
門下平章事上谷郡王贈太師謚曰貞武惟公承太傅貞
武之遺烈受嚴凝溫厚之全性戴翼其代撫征其人戎容
山立盛氣玉色英風義聲輝燿光明調鼎七歲秉圭三覲

爰立於明廷考終於會朝卓爾拔乎倫類沛然滿乎觀聽
凡異姓而王真食其封於三公備司空司徒太尉之任於
三師歷太子太保太傅之秩累階宰職乃於中書令名器
始終與勳伐俱初公生當上元寶應之閒天下兵興感激
代故閒關力用始自掾曹官衛以至卿寺臺閣金艾采飾
祇庸顯明寶臣物故成德不靖公以弱冠偏師破朝鮮於
東鹿禁旅急病薊人挺災公以中權衡擊脫西平於清苑
此其裕蠱宣力之章章者貞元七年貞武公薨於位朝廷
以公狎貫戎重可輯寧一方繇定州刺史起領留府禮服

外除策勲懋官統節制之師修方伯之職累丁趙國魏國
二太夫人憂喪祭情理一其哀敬凡三奪齊斬以從王事
孝文當陽考禮述職瞻斧宸於法座順宗繼明保乂齊信
執壤奠於翌室今上報本侍祠肅事奉圭幣於泰壇至於
浹洽邴魏優游平勃錯綜事典習通儀制樹善於廟堂陳
謩於穆清迥出功臣之表實行宰相之事矣前年冬詔武
庫禁兵會諸侯之師於常山分道並出鹵帥絕太行越飛
狐是日北道以公爲主於是創廢置以闢磽陋悉芻米以
給賦輿軍尉裨校待之滿志供具宴餼無非加等亦旣壓

境士皆賈餘公與羣帥屈指環城有日矣恆人以步騎二萬踰木刀溝爲從衡七里之陣來薄於城公擐甲出壁門徑當其鋒俾其子克讓與猶子克儉甥陳楚等分搦之設左右翼以待之出奇決命凡數十合取巧於七縱蓄銳以三捷席勝鼓行橫屍如陵方申盡敵之算俄奉班師之詔因喟然曰自五十年間兩河多壘縣官以在宥含垢懷和萬方推恩息人延代賜履或恃長轂且踰短垣至有相依若輔車相求若市賈雖有長智不能自還大丈夫亦當排霧縠而翔慶霄出樊籠以徃闔闔行之自我仁遠乎哉姑

請軍司馬於朝使人狎其理然後以一方之地圖戶版三
軍之駟介伍符授焉子文告令尹之政士薦傳太傅之法
拜章擢日盡室就途舉代得請然後有河內之命麾幢纔
至於理所劔履遽來於轂下沃心體國指掌論邊慷慨行
義涕洟交感方受面命以班詔條嶷然持重爲守臣表率
其或行不俟駕幹不庭方清昆夷埽獯然後銷五兵爲
農器驅一代爲壽域此公之心也噓夫以析木之下將相
代家按節股肱郡在諸侯王上而薦紳文吏擁旄山東廉
風俗於武旅之地修班制於戰爭之後是一舉也而二美

行焉君子以爲元和理平之嘉瑞雖西漢之白麟黃龍不若也始公割符三年而分闔又四年而進律以州爲都府而爲長吏又七年而爲公明年作相最凡盛大幾三十年君臣極其感會天下仰其風采詔葬法賻率用汾陽王咸寧王故事所不至者歿於中身豈造於物者不與其全歟此吾君所以當宁流慟而歎其用之未極也夫人衛國夫人李氏滄州刺史兼御史中丞陵川郡王固烈之女閔閔慶祉淑明柔嘉由內外音徽以大凡所顧復皆爲善良克讓以勞而貴以毀而歿克恭以才能厯卿士克禮以淑令

儷夫人克禮之季曰沙門宏信宏信之季曰太子舍人克
從少府丞克勤光祿丞克正等稟訓尚義執喪知禮闈門
積厚名教多之德興久辱深知謬參大政疇庸之命親奉
聖謩謨德之詞式藏厚載銘曰

太尉兵柄中書理本桓桓令君宣令分閫行旆搖搖馬鳴
蕭蕭華袞九命介圭三朝乃率賦輿乃頒詔條先台諒闇
霽霾蔽晦詞極切劘義形風槩皇明光宅績用章大恒碣
之閒革車所會蹈厲策勳推授交代皇用疇庸徧登三公
毅然舉宗來自山東周有申伯漢稱竇融乃陟其明於河

之中行道有福爲仁由已哀榮思福冠耀終始少陵爲谷
幽宅在此中南如礪令聞不已刻銘泉壚與天壤俱

唐故山南西道節度營田觀察處置等使開府儀

同三司檢校尚書左僕射同中書門下平章事

兼興元尹上柱國馮翊郡王贈太保嚴公墓誌

銘

并序

序曰陰陽和而萬物得君臣合而九功敘內竭忠力外修
班制匡戴藩輔勤勞王家安危注意終始尊任明德大烈
爲信臣龜龍者其惟太保馮翊王乎太保諱震字遐聞本

馮翊人後徙家於梓潼曾祖豐皇劔州司馬大父和本雙
流縣尉贈遂州刺史仍代貞晦以至皇考審綱天爵內充
聘問不屈蓋君平湛冥之遺烈也四追命至尚書左僕射
公少有風節忠厚閎大學涉古今之變器包王佐之畧三
命官至合州刺史嚴黃門武時領方任寘諸牙門副軍攘
寇威望大著又三徙至太常卿秩銀青光祿大夫黃門既
沒公亦居息常以智免不爲利疚李僕射叔明之至也以
前後功勞上聞起家拜渝州刺史公曰李公中外之姻也
今茲推達無乃誘於私乎義無所苟移疾罷去是歲遷鳳

州刺史充本道節度副使攝侍御史先是兵火未戢州壤蕭然庸亡斃踣數閭無幾公乃翦其荆棘弔其傷痍毀家以佐軍約已以裕人精力不懈視之如子朱周月而四郊襁負感甚以泣曰巖公之仁父母不若也尋丁內憂詔復厥職充興鳳兩州都團練使血涕拜章三上不允就加殿中侍御史至於御史中丞爵馮翊郡公進封鄖國階極儀同賞亦推恩居部十四年考課爲天下最教訓盡其物宜編人有以質俚之詞據其肝膈刻巖石而頌公者雖古之善頌不能加焉建中三年陟報政之尤修連帥之職拜梁

州刺史御史大夫山南西道節度觀察等使後二歲皇帝以避狄之亂狩於是邦加戶部尚書馮翊郡王公以漢中形東壤制邇於京師陳蕃主斷咫尺三接清蹕旣駐皇心乃夷大僚法從儲峙肅給事不乏於上人不勞於下於是師期四合士氣百倍神武陰隲諸侯鼓行丹水卽戎乃申恢復之畧塗山執玉克備聲明之禮夏六月詔梁州爲興元府公爲尹遷尚書左僕射眞食二百室其於先事備戎贏糧積甲北達於駱谷成功翼從除道執勒西至於散關屬車以安重險斯濟明智一德合於宸衷仍歲來朝命賜

備厚溫室宴見園丘侍祠事業焯於功令形容繪於麟閣
時所難能而公沛然常以同谷陰平備邊要害乃建堡壘
新廩庾禦寇有金湯之固焉積粟有水火之饒焉出輿師
以會漢南之討而人不知役操量鼓以濟中都之歉而敏
必有程盡慮以幹王事多方以佐百姓而又精於鑒裁敏
於推擇能樹善於幕庭終翰飛於公朝率由慰薦而後光
大至於爲宗工近臣賢大夫良二千石者列於中外書曰
慎簡乃僚又曰俊人用章惟公有焉貞元十二年同中書
門下平章事崇德報功於是乎在純誠積戀亟請朝謁上

以一方戎重優詔止之十六年六月癸巳感疾薨於理所
春秋七十六追贈太保廢朝三日弔祠法賻率有加數乃
有兵符命書授公從祖弟代之才旣得於官下恩實彰於
身後及輅車之至也又詔有司備禮冊命以其年十月丁
酉葬於長安縣居安鄉之某原前夫人武功郡夫人蘇氏
劍州長史束之之女繼夫人沂國夫人王氏試左千牛衛
長史舟之女咸具柔德以宜家道長子誠河中府士曹參
軍次子協殿中侍御史劍南西川節度推官嗣子公弼以
文學克家仕至國子監主簿以似續疏土封會稽縣男幼

子公貺亦以修詞爲州黨所薦祇服義方綽綽有裕哀敬誠信之禮備焉初公從父兄侁以含章好義歷中執法剖符廬山同氣曰堅曰霽曰霽皆卿才也堅爲咸山咸安二郡守霽以殿中侍御史介於岷峨霽四爲尚書郎猶子聳雅皆用文雅筮仕有名於時信乎致義貽訓知人之全也弼以德輿職忝司言知大臣之功行捧持官簿哀託銘篆是用論次藏諸九原銘曰

憲憲馮翊平康正直柔嘉強毅允是三德端誠啟迪有大勳力河池理平物遂其生漢中經武人悅是舉智能扞患

忠以衛主謀猷旣臧翼戴以恭黃道捧日卿雲從龍梁山
斯峻碩德斯鎮瑠戈金鉉戎輅相印時惟元老克叶昌運
方壯其猷天胡不憇塗芻卽遠金石傳信作銘元堂永識
休問

欽定全唐文卷五百六目錄

新文藝出版社藏書

權德輿 二十四

唐故中大夫守尚書工部侍郎兼御史大夫史館

修撰上柱國賜紫金魚袋充弔贈吐蕃使贈禮

部尚書張公墓誌銘

并序

唐故太常卿贈刑部尚書韋公墓誌銘

并序

唐故朝議大夫太子右庶子上柱國賜紫金魚袋

韋君墓誌銘

并序

唐故太中大夫守太子賓客上柱國襄陽縣開國

男賜紫金魚袋羅公墓誌銘

并序

唐故朝散大夫守祕書少監致仕周君墓誌銘

并

序

唐故正議大夫衛尉少卿聞喜縣開國伯賜紫金

魚袋裴君墓誌銘

并序

唐故尚書工部員外郎贈禮部尚書王公改葬墓

誌銘

并序

唐故河南府登封縣令權君墓誌銘

并序

殤孫進馬墓誌銘

并序

唐故潤州昭代寺比丘尼元應墓誌銘

并序

唐大興善寺故大宏教大辯正三藏和尚影堂碣

銘

并序

先公先太君靈表

欽定全唐文卷五百六

權德輿 二十四

唐故中大夫守尚書工部侍郎兼御史大夫史館

修撰上柱國賜紫金魚袋充弔贈吐蕃使贈禮

部尚書張公墓誌銘

并序

有唐博物通理之君子常山張君諱薦字孝舉以小司空
亞丞相將大君之命結絕域之成貞元甲申歲夏六月出
車國門在途被病秋七月戊寅復左轂於青海之西其孤
敦簡與軍吏章騎護轎車而東明年春三月至於京師天

子憫然加恩追崇太宗伯俾尚書郎弔祠職喪法賻秋七月癸酉安宅於某原君之先漢常山景王耳之後也曾王父義皇澤州治中王父文成司門員外郎贈國子司業烈考不忒揚州天長縣令贈睦州刺史代名儒學至君章大七歲善屬詩十歲通太史公書未弱冠有令聲於江湖間優游恬智博貫古今約已求志視苟進如探湯東諸侯表其材以聞廷命左右禦率府兵曹參軍尋以傳車徵加史館修撰以勞授陽翟縣尉朝廷難諷議禮文之任拜左拾遺換太常博士東求雋茂遷工部員外郎轉郎中修保氏

之職擢左諫議大夫爲權倖者所侵改祕書少監用久次
升爲祕書監前年戎王發導譯請棄細故以休寧西方先
皇帝思所以臨存卽敕故有冬官南臺之拜自筮仕至沒
身與載筆終始書盛聖一王之法考周禮魯史修明褻貶
好古者謂君辨裁而直其爲禮官講貫洽聞統同辨異之
大乖疑隱微之旨皆折中於君而優爲之貞元郊祀告類
報本再以臺郎攝贊大儀知禮者謂之閎達而敏使節法
冠從古所難始則內廷參侍出疆命介次則專席委重登
車有光減邊貢之蹄轍紆齊人之杼軸四牡所履陰方洽

金史卷之三十一 卷之三十一
驩及是以撫和憬俗非君莫可竟以靡監終於絕漠感慨
者謂君盡瘁而忠凡歷十官而八在歷其他三帖職二承
攝一追命春秋六十一君子之道有初有終悲夫惟君端
直廉正醇釀博厚儼若彝器中涵靈龜以庸制祿故不至
隱約以道藩身故不至燻灼中立大朝爲名卿碩儒和而
不同直而不詐東陽之長者富平之默識繫君有焉初興
元貞元之間轂下饑旱乘輿避正殿君引古抗章條其日
數詳定昭德皇后廟樂及太儀位號儀大臣祔廟鼓吹之
法皆稱典義而爲故事有文集三十卷犖犖然君子之詞

也上疏陳史職利弊指明切實有裨王度著史道先生傳
臣節之貞厲見焉纂十祖贊家風之德善章焉至若宰輔
傳畧靈怪集同僚籍寓居錄等又數十編自成一家之言
初娶太原鄔氏某官之女也繼室安平郡陳氏某官某之
女柔嘉有儀而賦命不稱嗣子敦靖爲官衛紀綱掾次曰
敦簡參鄭州軍事次曰敦業敦謙敦紹等克家孝謹執禮
哀敬以德興再同玉堂金華之署承先子之歡里仁服義
爲日固久泣狀遺懿以表識爲請是用舉其大而畧其細
銘諸墓門其詞曰

天下圭表繫乎史職印印冬官二紀良直王者惠澤先於
遠人皇皇使軒三抵殊鄰禮以節事每馳極摯文以導誠
克諧雅聲思若雲鬱心猶砥平懷黃刻采兮實稱其服志
力方壯兮奄然不淑有生必化兮邃古同塗憫君轉祓兮
來自外區難也收子兮故人刻石湛恩祿印兮賁此幽窆

唐故太常卿贈刑部尚書韋公墓誌銘

并序

維貞元十七年秋七月乙酉太常韋公諱渠牟年五十三
啟手足於靖恭里戊子詔書以大司寇印綬告第其孤博
古近古等號眺崩慕以冬十一月甲子著與蔡叶告窆於

某原其徽數用天子之追命其誠儉用先人之理命既而
續書出處之義行官業請斲圓石藏於塚內云公字某京
兆杜陵人自楚元王傅漢丞相節侯恭侯而下其族盛大
天爵人爵沛然兩集六代祖範隋郿城莊公曾祖餘慶皇
坊州刺史祖景駿房州刺史父永著作郎兼蘇州司馬同
氣齊名皆以文學論著爲賢卿大夫而著作志氣閎邁落
落有奇節公卽第若干子也年十二善賦詩屬書未弱冠
博極今古尤精史籍力行過人且以爲夫子在魯則衣逢
掖在宋則冠章甫范蠡在陶爲朱公在齊爲鴟夷子皮於

是傳心印之法於金陵授谷神之道於華陽或爲塵外人
或爲遺名子其達觀也不名一行其元同也會歸三教蓋
周流揭厲無入而不自得焉終以儒服服素王之道大歷
末丁著作府君憂倚廬於壤樹之側以純孝感嘉生廉車
列上州間聳敬貞元二年起家拜校書郎五年轉左武衛
騎曹掾皆爲知己者從事八年大成均表其名經可領學
徒遷四門博士十二年夏承詔與近臣名儒縉黃大士講
議於麟德殿上以爲能拜祕書郎尋獻詩七百字極其文
采歲中歷右補闕左諫議大夫再當言責之地切廟獻替

數進熟於君規事建議臆起鋒山卓犖頡頏取重於時三
接日盱公卿仰其風采薦巖穴有道之士以待兩言其他
推轂皆一言感慨就義若渴見不善如探湯與夫陰拱自
愛持容容之計者固為愈矣閒一歲遷太府卿錫以命服
又閒一歲遷太常卿泉藏受用之法縣絕禮文之事峻科
禁以絕其私酌儀制而合於中被病乞告禮愈優而不得
請壽與志皆未極而歿悲夫公敏於歌詩縛采綺合大凡
文集若干卷撰莊子會釋老子金剛經釋文孝經維摩經
疏三教會宗圖共十餘萬言又奏修貞元新集開元後禮

二十卷詔下有司令行於代當其憫坐馳哀弱喪也泛然若不消於物及披肝膽承顧問也毅然若不有其身起儒官博士十三四年踐文石登玉堂赤車金印燻灼中外其所以得之者無他腸故也禮器曰觀其發而知其人之智洪範曰俊人用章噫嘻太常之道其智而俊歟雅爲晉國韓公魯郡顏公之所薦寵魯公嘗稱遺名子洞徹三教讀佛書儒書道書向三萬卷又多言其神奇之跡今茲不書姑書其章明宏大者用識窻窻一以申嘗僚之義一以遂孝子之心其銘曰

儒有奉常兮旁觀三元強志敏心兮詞義紛綸初委約以
卷懷終發舒而顯尊出四門兮登三閣居保氏兮諤諤開
知囊以當法座印纍纍而綬若若天衢凌厲兮才較羣艾
服官政兮年中身飈截道兮駟過隙夫何一氣聚散之汙
汙逝者固不可作兮鏤貞堅於墓門

唐故朝議大夫太子右庶子上柱國賜紫金魚袋

韋君墓誌銘

并序

君諱聿字某京兆杜陵人六代祖郿城莊公範有勲力於
周隋間範之孫機實居大農艱貞忠厚書在國史機之孫

贈太子少保岳八子爲二千石皆有風績生贈太子太師
賁仕至藍田尉清方粹遠天爵自修有才子四人君爲冢
嗣承少保太師祖禰之慶故延耀發舒於君伯仲之間少
開敏有才智通覽書記不爲章句儒天寶中以門子奉清
廟齋祠試言會府補宣州南陵尉歷揚州天長丞越州兵
曹掾涇原節將表爲參軍以廷尉平攝監察御史未及行
授揚州錄事參軍尋爲本府薦拜祕書郎兼殿中侍御史
以官名心懼換太子司議郎俄擢侍御史檢校祠部員外
郎皆爲淮南從事貞元十二年徵爲水部員外轉比部郎

中德宗召見賜以金紫命服俄遷衛尉少卿國子司業用
久次拜右庶子元和三年九月景戌以官壽歿於長興里
春秋七十五君初筮仕已辨疑摘伏全活枉濫厥後率爲
守臣薦引歷丞史紀綱掾皆以理效聞自簪法冠贊戎重
或筦府政以修吏理若摻籛鍾而揮孟勞度音觸物非輩
類所及所奉之主卽故居守杜扶風公今司徒岐公其人
也介弟太尉南康忠武王有大烈於王家同氣致美士林
景行不乘勢以燻灼每虛懷而坦蕩再爲尚書郎業以修
計部稽百事財用之數嘗欲覆視禁軍董正其簿書雖事

適中止而聞者竦歎洎佐師氏相東朝克詳憲令以中宜
適朝請休沐或近郊考勝漢廷臣賢士大夫車常接轂必
醞酒理具懽怡晏晏交有久要而言無瑕謫平夷疏達造
適遺累有君子之槩焉與夫拘攣枯槁局束於一代者異
日論也素強力無疹痲奄忽啟手足庸詎知非五福之康
寧以考終命耶岐公以元老總國柄每退朝清問日與君
晏言一旦相失涕洟怛化夫人滎陽縣君鄭氏某官某之
女淑溫仁順爲六姻法凡合體若干年先於君歿者半歲
嗣子行檢進士第自協律郎移朗州司戶有文業爲素藝

器幹次子業行修皆修詞與計偕次某等顯經術某某等尚
幼女子有行者四人在襁抱者三人子壻某官某某官某
等皆華宗良幹匍匐會事行檢等令龜揲著得十月某甲
子吉以德輿同辟公府周知所履將琢圓石見咨直書銘

曰

桂陽之系郿城之裔伊上族兮亞於大僚相彼東朝介豐
福兮吉凶糾纏以息闕二字斯不淑兮直城南偏卽遠歸全
覆夏屋兮茲焉追琢以識冥漠表陵谷兮

唐故太中大夫守太子賓客上柱國襄陽縣開國

男賜紫金魚袋羅公墓誌銘

并序

公諱珣其先會稽人蜀廣漢太守蒙晉西鄂節侯憲給事中龔皆以茂績焯於前載曾祖彥榮皇同州長史祖思崇韶睦常三州刺史父懷操桂州興安縣令贈華州刺史實有清行藏於家牒公早孤貧篤志好學舅氏徐吏部浩器以遠大以其兄之子妻之寶應初上書言事廷命太祝由吏資轉長水河南二縣尉萬年主簿分董計司湘中之賦授大理司直嗣曹王以宗室吏師節制洪荆襄三府公皆贊其師律歷監察御史殿中侍御史祠部員外郎府除徵

爲奉天令刺廬壽二州就加御史中丞入爲司農卿京兆
尹移疾乞告改太子賓客凡莅十六官考績四十四年宏
厚有局度辯論通史事敏而文忠而能力緣飾楨幹所居
可紀初結綬滿歲調於有司會舅氏居選部上其名於宰
府試言二篇比興菁華及賓曹郎兼管書奏下安陸應山
露布於朝矢口兩下含章迅發介漢南也武人因府喪以
劫軍實講張無狀公立斬首惡十餘曹且命環棘於庭俾
投所取以貫罪閒一日而金幣皆復微公之才則一方幾
亂其宰陵邑內官旁午吏有因緣橫猾以犯禁者榜笞至

死人用知懼凡田里之闕庸亡之徠皆倍於始至而不書於籍廬江劇部號爲難理強家占田而寡人無告鄉校廢落而冗吏猥多被病者捨醫事求淫祀公皆去其弊而圖其利人人得盡四支之敏而務十全之術修起經師弟子以理庠塾每歲以廉茂計偕者倍於他邦化條簡易和氣浹洽靈芝產白雀至連率今司徒岐公上其理狀詔賜紫金命服壽陽與蔡人接壤有州師萬數天子命中貴人監理視方任焉訓武備飭文事嚴重廉清行第一入以材能爲九卿典司金穀由朱邑之課第循牟融之事任其尹

京轂不施鉤距嘗請減縣內平糴之半且以嘗賦輸於公
上者充焉精力惠養人蒙其利前史稱吏不廉平則理道
衰旋觀夫人之所涖有以見朝廷理道之所繇也年耆疹
癘乃喟然歎曰吾以澤國書生累至二千石居大農內史
止足休老其在茲乎拜章數上雖處以儲賓優秩而不得
謝以元和四年冬十一月啟手足於宣平里之私第逾懸
車者四歲夫人東海徐氏同州司馬參軍浚之息女婦道
柔正不躋偕老嗣子讓鄉舉進士博學宏詞能直言極諫
三登甲科爲校書郎咸陽縣尉毀瘠孺慕如不欲生號奉

輅車以某月日歸祔於會稽之兆域以德輿與公同服大僚頃歲奉行中執法之詔又嘗讀亡友楊懋功刻金石遺愛之說公之率履固爲周知識諸窻窻不敢辭也銘曰

懿彼君子兮有猷有守其心不回兮其進不苟中外賦政兮人之父母金艾被體兮華纓耀首月在子兮歲居丑復東榮兮寢北牖火黻列兮纁元紐歸鮮原兮巾廣柳邱夷谷變兮何不有追琢貞堅兮天地久

唐故朝散大夫守祕書少監致仕周君墓誌銘

并

序

君諱渭字兆師其先汝南人六代祖衡仕隋爲淮陰郡司

馬子孫因家焉曾祖頂

闕一字

杭州長史祖守則婺州金華

丞父隨州棗陽令三葉沈晦纓轂未華皆以義行稱於州里君服儒篤學工爲詞賦大厯末常潘繼居小宗伯號爲得士君與令弟澈聯中正鵠於二有司之下是歲孝文帝嗣大統詳延諸生又以貞師伐謀對有明法授汝州襄城尉時太傅崔文貞公以匪躬當國兼綜書殿表爲校理厯富平長安尉拜監察御史董選補於南方南方吏理清而風俗阜抑君是賴復命其勞轉殿中侍御史平理詔獄清

公不苛遷膳部員外郎祠部郎中典曹草議遵道循性居
太微積星之位十年不徙官其有據利權大竇燻灼於時
者君必畏而遠之居易自足前歲凶旱詔罷郡國選舉慮
穀下艱食之不給也君抗疏以爲無肆眚且久得非濫刑
失職者含冤以盪和氣邪臣以爲答於天戒者在此不在
彼雖留中不下而士友多之上皇踐阼章敘時儻君已感
疾拜章請老有詔授祕書少監以優遂之先築室於崇德
里有嘉樹修竹休沐吟詠以文自娛每得一佳句如獲官
祿恬於進取用此故也赤紱華髮燕居考祥方嗇精神以

順和理永貞元年冬十一月甲戌奄然大病以啟手足春
秋六十六夫人河東薛氏將作監丞腴公之女雅有儀操
有子三人從魯從禮從質克稟風訓以明年二月某甲子
號奉裳帷返葬於緱山縣唐興鄉之北原刻石銘墓以昭
景行銘曰

猗歟周君探六義思無邪詞頗類安久次復郎吏謝浮榮
佐中祕洛師緱原潛厚地刻勒貞珉書此誌

唐故正議大夫衛尉少卿聞喜縣開國伯賜紫金

魚袋裴君墓誌銘 并序

君諱會字某河南聞喜人有唐元老左僕射贈司空貞孝
公之元子惟司空左右肅宗壽與位侔百順五福宜鍾厥
後雖不能嗣居公相者必用攸好德考終命焉君孝悌睦
友慎厚敬讓直而和柔而不犯馴行克家學古入官乾元
初筮仕太常授奉禮郎再轉至主簿廣德初以宰相子行
修飾特加正議大夫累登東朝爲中舍人率更令仍副少
府又貳殿中今司徒北平王之節制河東也表爲戎佐檢
校吏部郎中貞元元年旱蝗相乘列郡災耗君奉府檄蒞
於定襄勞徠安集有異等之效就加金印紫綬以疇其能

五年從北平朝京師真拜膳部郎中八年轉衛尉少卿九年戊申終於位享年四十六噫嘻君有甘白之姿而受采和有惠蘇之量而蒙覆露徊翔省寺周旋官業質於典憲故不踰詳於奏議而有章盡齊敬於宗廟惇愷悌於族屬以友輔仁以酒全神忘懷久次未嘗諂黷雖不踐右職立章章之效而厯官十一列爵故里辟三公府以政事稱被薦紳奉朝請者逾二十年無過言無違德故其手足歸全於先公君子以爲難再娶皆博陵崔氏前夫人新繁令平之女繼夫人大理評事陽元之女咸有婦順不幸早夭其

孤曰定爲左千牛備身定弟密密弟字年甫成童咨於叔父前京兆府戶曹向以十月某日返葬於東周萬安山之南原二夫人祔焉孝子悌弟用誠信襄事禮文家法率履無違言世功冠族者以裴氏爲河東盛閥自魏翼州刺史徽種德滋大纂承紹續十有二葉至贈中書舍人義宏仕至梓州元武丞君之大王父也舍人生贈司空惓歷給事中杭鄧二州刺史君之王父也門業風緒天下稱之今纂書其畧刻於墓石銘曰

濟濟德門溫溫恭人司空之子司徒之賓位止亞卿年不

中身遽歸其全乃返乎真上有宰樹今下有野土閱此幽宅兮萬安之下

唐故尚書工部員外郎贈禮部尚書王公改葬墓

誌銘

并序

元和十年秋故兵部尚書贈尚書右僕射王公之孤曰元泰元質元弼等舉其王考贈禮部尚書之殯於玉山王妣贈隴西郡太夫人李氏之窆於潁陽泣問龜策得八月壬寅安祔於萬年縣鳳棲原吉克成先志孝孫之心也尚書諱端字某太原人曾祖某某官祖某某官代理儒術至公

以文學策名舉進士宏詞連得雋於春官天官之下解巾
崇文館校書郎改右驍衛兵曹掾隴右節度奏授大理評
事爲其上介天寶十年拜監察御史十三年轉殿中侍御
史俄以本官內供奉贊東京畿採訪之重十四年遷工部
員外郎謝病請長告南浮江湖因寓幽陵兵亂啟手足於
行次春秋若干是歲乾元二年也娶隴西李氏隋太師申
國公穆五代孫吏部郎中問政之孫城門郎韶之女賢明
有儀操生子三人長曰綽被服緇褐修無生法次日紆以
文章繼公用雋造履清近諫垣載筆在帝左右綱紀都曹

典司庫兵歷外郎正郎直誠厚行爲士君子儀矩次曰紹
繇小司徒三爲六官於外則保釐東郊節制徐方當德宗
朝嚮納尊信漢廷臣莫二時上馭天下歲久宰政之外大
僚往往以辨智材能獻熟得君者或險決以務伎害或妄
誣以取快愜僕射則和平將順不疚不惑人到於今稱之
故公以義方貽慶再受二千石五曹之錫積厚流光可勝
言哉先遠襄事未得吉卜而歿元泰等茹荼繼志經啟鮮
原以德輿與其先人同於汴東江西從事同爲郎吏同爲
尚書藐然無容見託傳信雖文之朴野其可辭乎銘曰

尚書爲父僕射爲子家聲章章令聞不已萬有千年兮邱封在此

唐故河南府登封縣令權君墓誌銘

并序

噫嘻吾之從祖弟曰少成字某仕至河南府登封令而歿其年五十七曾王父益州成都縣尉府君諱無侍王父許州臨潁縣令府君諱伋父華州司士參軍府君隼三葉有文行而賦祿不稱當時才士名人皆與之遊君甫成童通左史古文小戴禮以經明調選爲睦州桐廬尉凡七徙官皆以功次得調其爲右威衛紀綱掾尚書郎有官人於黔

巫者請為之介裔夷得職其為河西尉奉職於左曹吏無
奇褻其為梁縣令也二千石領行詔條繆行徵令而多賦
於人屬城皆不能辨君毅然有守折其疑文詞堅氣正不
直不已梁人得以蒙其澤遂其生郡表尤異拜河南府兵
曹曹事修理元和十一年調補登封春二月病風痺逮秋
寢劇九月十七日啟手足於官次悲夫君仁厚質實廉隅
介獨潔清在公顛沛以之探經術法義往往以文自道不
務游談不馳名聲深知者以為古之循吏不若也階近赤
紱官近朱轡謂跂而及竟歿於周圻一同之地斯可慟也

娶博陵崔氏某官某之女雅有婦行長男頊以經明爲鳳州兩當令專敏好學次曰瑄華州參軍篤志於文章幼嗣曰某曰某皆在稚孺呱呱以泣頊等以明年二月安紆於伊闕之舊封禮也嗚呼吾無期叔父無期大功兄弟以至於君且有一歲之長班白相視疾恙相悲奄然委化痛入肝膈故出涕而銘之銘曰

東周蒼茫兮甸邑鮮原以之賦政兮以之歸根嗚呼不可作兮死生沍沍

殤孫進馬墓誌銘

并序

權氏殤子名順孫小字文昌以被病用桑門法更其字曰君吒贈太子太保貞孝公之曾孫今刑部尚書扶風郡公德興之孫渭南縣尉璩之子始仕爲僕寺進馬生十三年以元和十年十一月二十二日夭於光福里二十七日斂手足形於萬年縣神和原旣闔棺其大父泣而誌之曰爾幼有敏智孝順敬遜承大父母父母之教無違旨雖孝子順孫成人者之養不若也故吾以名之讀孝經論語尚書尤好筆札不離硯席凡舉措語言循理喻義出常童遠甚方肆小戴禮業未竟而感疾自春涉冬綿四時寢劇大病

之際上辭尊長下訣幼弟妹恬然不亂且謂其傅婢曰空中佛事儼然在目促焚香移吾枕西嚮合掌而絕始吾常疑神滅不滅之論逮今信矣噫嘻以爾已仕且有成人之志吾欲勿殤知禮者曰不可而不敢逾也惟大墓在洛師得陪祔之吉於後歲故於是權窆而號曰

惟魂氣兮無所之爾之神得所往兮吾又惡用夫涕洟

唐故潤州昭代寺比丘尼元應墓誌銘

并序

維貞元六年冬十一月戊子比丘尼元應化滅於潤州丹陽縣昭代寺享年五十四經夏十有三明日庚申寧神於

縣北之某原刻石紀墓虞陵谷之變也敘其畧則幼稟公
官之教早繼德門之室次有徙宅之訓終悟捨筏之宗紀
其詳則俗姓盧氏世閥華峻倬於漢魏以至北齊黃門侍
郎思道卽六代祖也曾祖悌隱居不仕祖暄皇中散大夫
邠王友贈祕書監父灃皇中散大夫婺州刺史惟先人叔
父迭領名藩出也作民父母入也爲王卿士再世出於裴
而舅族多賢繼貳六官聯居九牧中外纓冕之盛冠於士
林儲是德慶宜有淑喆初以旣筭之年歸隴西李君晉卿
仕至東陽決曹掾靖恭敏直齒位皆屈其於輔贊淑賢之

道槃袞組紉之事舉無違德姻黨宜之晝哭之後棲心釋
氏既厭有生之患竟從受具之法灑濯世網揭厲元津外
修尸羅中習禪惠法器方茂遽與化俱初決曹府君前夫
人范陽盧氏子曰暢幼懷字育之仁夙奉詩書之訓再以
經術踐甲科歷校書郎密縣尉柴毀藥藥鄰於滅性孝慈
相感名教多之銜恤卜兆竭其誠信附於窀穸之事率從
苾芻之儀且遺令也德輿於密縣爲族外弟服儒同術里
仁甚久哀託論謨謹無媿辭銘曰

柔濡清淨蓮花之性端明綢直淑女之行上無詒懼下振

母儀晚悟真諦空王爲師體魄者何電燄無期往而不復
哀哀孝思

唐大興善寺故大宏教大辯正三藏和尚影堂碣

銘 并序

三藏者何於心爲戒定慧於學爲經律論惟西域二大士
以正智法器爲天人師大宏教和尚本號金剛智南印度
人出家於那蘭陀寺道成於迦毗羅衛國事龍智阿堵梨
通總持灌頂之法入師子國登楞伽山航海涉險聿來中
土開元中隨鑿輅於兩都大智大慧皆樞衣請益春秋七

十三夏臘五十化滅於洛京起塔於龍門傳法於大辯正
和尚和尚法號不空師子國人母氏方娠夢佛光照頂弱
冠受具通三密法嘗齋國信往詣他方諷真言而海風恬
息結祕印而狂象調伏若歲大旱實作霖雨內出方袍之
錫猶命服焉至德初宣皇受命於靈朔譯不動尊經以獻
凡所以順天心而導善氣者又何可勝言自開元末至大
歷中三朝尊奉以密行救世代宗授以特進鴻臚卿賜號
大廣智三藏既以眾生病爲病於臥內加開府儀同三司
封蕭國公大歷九年夏六月既望示滅於興善寺追命司

空不視朝三日尊名曰大辯正遣中謁者弔祠報年減先師三歲而休夏同數初武皇帝崇大師以次公命卿也先師有儀同之贈宏教之謚大師之弟子曰沙門舍光曇貞覺超惠應於鄰潛真惠覺等或爲肅宗灌頂阿堵梨清涼山功德使或爲內道場三教大德或爲僧錄皆偉然龍象爲法棟梁而惠應惠覺傳授祕藏永懷世道乃於仁祠法堂嚴事華飾儀同在西蕭國在東睥容德宇瞻仰如在應公又推本其教曰昔毗盧遮那如來入不空王三昧說瑜珈最上乘義授於普賢以平等性智而造妙覺一印含萬

法五部周四方金剛之堅利蓮花之清靜悟入之速可思
議哉普賢授龍猛龍猛授龍智凡千百載而先大師授於
大師纂服六葉之教紹明三摩之法攝護成就斯爲妙門
大凡翻經七十七部一百卷命書愍冊表章答禮傳譯之
差次第子之號名環周素壁聳視生敬淨名會中亦參世
典宏明集內無匪佛乘初先大師之滅也呂工部向杜衛
公鴻漸爲之記大師之云亡也嚴京兆郢沙門飛錫爲之
碑感緣行化皆以詳熟今應公以二大師遺影之在此堂
也不可以不識應公入大師之室德與入應公之藩以茲

因緣俾揭文字銘曰

法身徧照六葉傳妙惟二大師三朝演教天竺西極瑜珈
度門蓮開法界月破重昏儼然象設復獲親覲如聞軟語
如結祕印一室之中寂然感通道行無窮法子之功

先公先太君靈表

先公以大曆二年歲在丁未夏四月十四日棄代於潤州
先友趙郡李公遐叔已爲之墓表先太君以貞元四年歲
在戊辰夏六月二十三日棄代於洪州亡友安定梁肅寬
中又爲之墓表乃今元和十二年歲在丁酉秋七月十五

日壬寅孤子山南西道節度觀察使銀青光祿大夫檢校
吏部尚書兼興元尹御史大夫扶風郡開國公德興始獲
備誠信以追命徽數昭告啟二封於丹徒祔神於東都萬
安山之北原其終始大要官闕大本並已具李氏之說孤
窮噉號以補其闕文先公以永貞元年再追命爲工部尚
書元和二年三追命爲太子少傅七年四追命爲太子太
保太常考行易名曰貞孝公先夫人元和元年追命爲燉
煌縣太君二年再追命爲絳郡太君先公有事君事親之
大節道積於身而不得大行於時時不得蒙公之化士大

夫之論炳如日星煜若鳳麟夫人輔佐中饋爲人倫師式
上事姑下訓子爲順婦爲慈母孝愛寬順得內姻外姻之
和如惠風甘雨長育生物永惟二尊并包健順用晦其明
不丁於時受名器褒錫於冥冥之下覆露蒙昏叨冒顯榮
踰量腊毒日俟顛隕嗚呼曾王父以上葬於本州今限異
域至王父葬於伊水之陽屬者卜祔於伊水之陽不吉得
萬安山之原吉以歲之不易與時之多故久未遷神懼至
沒身常泣謂稚子璩曰苟吾未襄事死而不可以歸骨於
九原不可以請謚於有司則天幸克申私志異日從先

公於斯邱也是得養於下也尊行淑聲備於前銘繼此謨
刻哀荒罔極